

## «Ҳаж-2019» мавсуми Саудиянинг «Ал-Рияда» ва «Ал-Жазира нашрлари нигоҳида



10:00 / 05.08.2019 2247

Саудия Арабистонининг етакчи » газеталари Ўзбекистон вакилларининг «Ҳаж-2019» мавсумидаги иштироки ҳақида мақола эълон қилди. Бу ҳақда Дин ишлари бўйича қўмита матбуот хизмати хабар беради.

Мақолада Ўзбекистонда ҳаж ва умра зиёратларининг ташкилий ишлари мамлакат Вазирлар Маҳкамасининг қарорлари асосида амалга ошириляётгани таъкидланган. Муаллиф Ўзбекистон ҳаж ва умра тадбирларини ташкил этиш ва ўтказиш масалалари бўйича жамоатчилик кенгаши, Дин ишлари бўйича қўмита ва Ўзбекистон мусулмонлари идораси вакилларида ташкил топган делегация 2019 йил январ ойида Саудия Арабистони ҳаж ишлари вазири Муҳаммад Солиҳ Бинтен билан учрашиб, музокаралар ўтказгани ҳақида ёзган.

“Мазкур учрашувда Ўзбекистон Республикаси ва Саудия Арабистони Подшоҳлиги ўртасида Ҳаж шартномаси имзоланди ва ҳаж тартиботлари ва жадвали буйича Ўзбекистон ҳожиларини ҳаракатланиши юзасидан барча масалалар муҳокама этилди”, деб маълум қилган Ўзбекистоннинг ушбу мамлакатдаги элчиси Улуғбек Мақсудов нашрларга берган интервьюда.

Ҳаж вазири М.Бинтен мамлакатимиз вакиллари билан мулоқотда Ўзбекистон томонидан барча ташкилий ишлар ўз вақтида ва бекаму-кўст ҳал қилинаётганини эътироф этган.

Бу йилги мавсумда ўзбекистонлик 7 минг 200 нафар зиёратчи Саудия Арабистонига келиб, муборак ҳаж сафари амалларини бажаришмоқда.

“Ўзбекистон Республикаси Президенти Шавкат Мирзиёевнинг ташаббуси билан зиёратчилар учун муносиб шарт-шароит яратиш, ҳаж харажатларини янада арзонлаштириш борасида амалга оширилган чоратadbирлар юртдошларимизни чексиз қувонтирди, - дейди мамлакатимиз элчиси саудиялик мухбирларга. - Ҳаж сафари билан боғлиқ ташкилий ишлар йилдан-йилга яхшиланиб бормоқда. Масалан, илгари ҳожиларимиз икки ва уч юлдузли меҳмонхоналарда яшаган бўлса, 2019 йилда Мадина шаҳридаги 5 юлдузли “Пуллман Замзам” меҳмонхонаси, Макка шаҳридаги 4 юлдузли “Абраж ал-Ҳидая” меҳмонхонаси ижарага олинди. Бу эса зиёратчиларимиз бор диққат-эътиборини ибодат қилишга қаратишида яна бир муҳим омил бўлмоқда”.

Саудия Арабистони нашрлари журналистлари ўзбекистонлик зиёратчиларни кутиб олиш, кузатиш ва уларга қулай шарт-шароит яратиш ишлари махсус ишчи гуруҳи, Ўзбекистоннинг Жидда шаҳридаги Бош консулхонаси ва Саудиянинг “Ал-Ҳидая” ширкати ҳамкорлигида ташкил этилаётганини хабар қилган.

Мақолада Ўзбекистон раҳбарияти томонидан мамлакатимиз вакилларининг ҳаж ва умра зиёратларини мукамал бажаришини ташкил қилиш йўлида амалга оширилаётган саъй-ҳаракатлар ҳақида батафсил маълумот берилган.

***Islom.uz портали таҳририяти***